



Aningaasaqarnermut Aatsitassanullu Naalakkersuisoq

Ulloq: 28. september 2016
J.nr.: 01.31.06/16-00731

Aningaasaqarnermut Akileraartarnermullu Ataatsimiititaliap sisamangornermi ulloq 22. september 2016-imi aalajangiinera pillugu Naalakkersuisunut ilisimatitsineq.

Arctic Winter Games 2016-imit aningaasat sinneruttut atorpeqarnissaat – suliaq nr. 01.31.06/16-00731.

”Naalakkersuisut inassutigaa,

- Arctic Winter Gamesimit aningaasat sinneruttut siunertamut Host citymit aalajangerneqartumut atorpeqassasut aamma aningaasat taperseeqataasunut Nunattalu Karsianut utertinneqassanngitsut.”

Aningaasaqarnermut Akileraartarnermullu Ataatsimiititaliap oqaaseqaatai apequtaalu:

Aningaasanit sinneruttunit Nunatta Karsiata akileeqaataassutigisai tapiissuteqartunut aningaasaliissuteqartunullu utertinneqassanngitsut Naalakkersuisut inassutigaa. Tamatumunnga taarsiullugu aningaasat sinneruttut suliniutinut AWG-mut attuumassuteqartunut atorpeqarnissaat siunnersuutigineqarpoq.

Suliniutinut AWG-mut attuumassuteqartunut aningaasat AWG-mit sinneruttut allamut atorpeqarsinnaanerata ataatsimiititaliamit tapersornartinneqarpoq. Aningaasalli allanut atorpeqarsinnaanerata Naalakkersuisunit isumaliutigineqarsimanersoq ataatsimiititaliamit paaserusunneqarpoq. Assersuutigalugu aningaasat ivigaasanik arsaattarfinnut atorpeqarnissaat Naalakkersuisunit isumaliutigineqarsimava?

Suliami maleruagassanut tunngassuteqartut eqqarsaatigalugit Naalakkersuisut inassuteqaamminnut tunngavilersuutaat ataatsimiititaliamit assorsuaq tupigusuutigineqarpoq. Naalakkersuisut inassuteqaamminnut tunngavilersuutigaat utertitsinissaq periarfissaanngitsaq, tassa takuneqarsinnaanngimmat tapiissutit sorliit imaluunniit tapiissuteqartut ataasiakkaat (Naminersorlutik Oqartussat, Kommuneqarfik Sermersooq aamma namminersortut aningaasaleeqataasut) tapiissutaannit qanoq annertutigisut atorpeqarsimannginnersut. Nunatta Karsiata aningaasaatai qanoq atorpeqarsinanerat nassuiaatigineqarsinnaanngimmat ataatsimiititaliamit assut isornartoqartinneqarpoq. Tamanna piaarnerpaammik aqqinneqassasoq ataatsimiititaliamit kaammattuutigineqassaaq.

Aningaasaliissutit atorpeqarnerannut malinnaanissaq aammalu aningaasaliinermi tunngavigineqartut naapertorlugit aningaasaliissutit sapinngisamik pitsaanerpaamik atorpeqarnissaasa qulakkeernissaat suliaqarfimmut Naalakkersuisuusup akisussaaffigaa. AWG-mut atatillugu aningaasartuuteqarnermi maleruagassatigut tunngavik tassaavoq kulturikkut ingerlatsineq sunngiffimmilu sammisassaqtitsineq pillugit Inatsisartut peqqussutaat nr. 10, 21. maj 2002-meersoq. Peqqussummi tassani § 38-mi ima aalajangersagaqarpoq: ”Peqqussut manna

malillugu tapiissutitut qanorlu allaffissornikkut aqunneqarnissaannut Naalakkersuisut malit-tarisassiorsinnaapput.” Assersuutigalugu naatsorsuusiornissaq pillugu Naalakkersuisut male-ruagassatut aalajangersagaat AWG-mit malinneqarsimassasut ataatsimiititaliamit naatsor-suutigineqartariaqarpoq. Taamaattumillu apeqqutaalerpoq maleruagassatut aalajangersakkaat naammattumik pitsaassuseqarsimanersut, tassami tapiissutisariavallaarsimasat naatsorsorne-qarsinnaasimanngimmata. Siunissami taama pisoqaqqinnissaa qulakkeerniarlugu Naalakker-suisut iliuuseqaqqullugit ataatsimiititaliamit kaammattorneqarput.


Kukkuneq siuliani taaneqartoq qanoq pinngorsimanersoq aammalu taama pisoqaqqinnissaa Naalakkersuisunit qanoq qulakkiilersaarneqarnersoq nassuiaatigeqqullugu Naalakkersuisut ataatsimiititaliamit qinnuigineqarput. Kiisalu tapiissuteqarnissamut taakkulu aqunneqarnis-saannut malerugassat piumasaqaatillu sukaterneqarnissaannik pisariaqartitsisoqarnersoq Naalakkersuisunit nalilerneqassasoq ataatsimiititaliamit kissaatigineqarpoq.

Allakkanut ukununga akissut Aningaasaqarnermut Ataatsimiititaliamit piaarnerpaamik tiguneqartussanngorlugu kalaallisut danskisullu kiisalu qarasaasiakku uunga nassuteqqu-neqarpoq: saam@inatsisartut.gl.

Aningaasaqarnermut Akileraartarnermullu Ataatsimiititaliap aalajangiinera

Siuliani allassimasutut oqaaseqarluni Naalakkersuisut inassuteqaataat Aningaasaqarnermut Akileraartarnermullu Ataatsimiititaliamit **akuerineqarput**.

Ataatsimiititaliap sinnerlugu



Jens Immanuelson

Aningaasaqarnermut Akileraartarnermullu Ataatsimiititaliap Siulittaasua